


顯揚聖教論

第二

二百卅三
尺二

49092



顯揚聖教論卷第二

無著菩薩造

大唐三藏法師

玄奘奉

詔譯

尺

攝事品第一之二

如是已說雜染諦今當說頌曰

諸諦有六種

論曰諦有六種一世俗諦二勝義諦三苦諦

四集諦五滅諦六道諦

世俗諦者謂名句文身及依彼義一切言說

及依言說所解了義又曾得世間心及心法

及彼所行境義

勝義諦者謂聖智及彼所行境義及彼相應

心心法等



苦諦者此有二種一世俗諦所攝二勝義諦所攝世俗諦所攝者如經中說生苦老苦病苦死苦怨憎會苦愛別離苦求不得苦勝義諦所攝者如經中說略攝一切五取蘊苦

集諦者此有四種一全攝二勝攝三世俗諦攝四勝義諦攝全攝者謂一切三界煩惱及業皆名集諦勝攝者謂緣已得未得自體及境所起愛後有愛喜俱行愛處處喜愛皆名集諦世俗諦攝者若因能感世俗諦所攝苦諦勝義諦攝者若因能感勝義諦所攝苦諦滅諦者亦有四種如前所說全攝者謂全攝集諦無餘斷棄吐盡離欲滅沒寂靜勝攝者

謂勝攝集諦無餘斷棄如是廣說世俗諦攝者謂於世俗諦所攝集諦無餘斷棄如是廣說勝義諦攝者謂於勝義諦所攝集諦無餘斷棄如是廣說

道諦者亦有四種如前所說全攝者謂一切覺分勝攝者謂八聖道支世俗諦攝者謂於世俗諦所攝苦諦集諦滅諦為徧知故為永斷故為作證故一切聖道勝義諦攝者謂於勝義諦所攝苦諦集諦滅諦為徧知故如是廣說

苦集滅道聖諦義者若於此處聖智所行此處苦集滅道是諦由諸聖者咸謂此是諦是

故說名聖諦

如是已說諦依止今當說頌曰

依止八與二

論曰依止有八種何等爲八謂四靜慮及四
無色復有二種何等爲二謂初靜慮有二種
世及出世乃至無所有處有二種世及出世
非想非非想處唯是世間

世間初靜慮者謂或緣離欲界欲增上教法
或緣離彼增上教授爲境界已由世間道作
意觀察熾然修習等故而得轉依然不深入
所知義故不能永害隨眠自地煩惱之所依
處是退還法自地三摩地心及心法之所依

止如世間初靜慮如是乃至世間非想非非
想處各緣離下地欲增上教法廣說如前出
世間初靜慮者謂先以如是行如是狀如是
相作意入初靜慮根不以如是行如是狀如
是相作意然或於色受想行識所攝諸法思
惟如病如癱如箭障礙無常苦空無我或復
思惟苦是苦集是集滅是滅道是道或復思
惟真如法性實際如是於諸法中思惟如病
乃至實際已於如是法心生厭怖生厭怖已
於不死界攝心而住或於真如法性實際攝
心而住此處無分別智及彼相應心及心法
及彼所依止轉依由深入所知義故則能永

害隨眠非一切煩惱之所依處不退轉法如是名爲出世間初靜慮乃至無所有處應當廣說

於諸靜慮及與無色復有四種應知一雜染二潔白三建立四清淨

雜染者謂於上靜慮起深愛味見慢及疑愛味者謂有十種一俱生作意愛味二分別所起作意愛味三自地作意愛味四異地作意愛味五過去愛味六未來愛味七現在愛味八下愛味九中愛味十上愛味

潔白者謂淨及無漏淨者復有三種一引發故二上練故三除垢所攝堪任故無漏者此

亦三種一出世間無漏二此等流無漏三離
繫無漏

建立者此復四種一建立近分二建立根本
三建立定四建立生
建立近分及根本者

如經中說所謂此身離生喜樂之所滋潤徧
滋潤徧適悅徧流布者是謂初靜慮近分如
經又說即此身中一切處無有少分離生喜
樂所不徧滿者是謂初靜慮根本

如經中說即於此身等持所生喜樂之所滋
潤徧滋潤徧適悅徧流布者是謂第二靜慮
近分如經又說即此身中於一切處無有少

分等持所生喜樂所不徧滿者是謂第二靜慮根本

如經中說即於此身離喜之樂之所滋潤徧滋潤徧適悅徧流布者是謂第三靜慮近分如經又說即此身中於一切處無有少分離喜之樂所不徧滿者是謂第三靜慮根本如

經中說即於此身清淨心及潔白心意解徧滿具足住者是謂第四靜慮近分如經又說即此身中於一切處無有少分清淨心及潔白心所不徧滿者是謂第四靜慮根本如經中說一切色想出過故一切有對想滅沒故一切種想不作意故入無邊虛空虛空無邊

處者是謂虛空無邊處近分如經又說具足住者是謂虛空無邊處根本

如經中說出過一切虛空無邊處入無邊識無邊處者是謂識無邊處近分如經又說具足住者是謂識無邊處根本

如經中說超過一切識無邊處入無少所有無所有處者是謂無所有處近分如經又說具足住者是謂無所有處根本

如經中說超過一切無所有處入非有想非無想非想非非想處者是謂非想非非想處近分如經又說具足住者是謂非想非非想處根本

建立定者

如經中說離欲惡不善法故有尋有伺離生
喜樂初靜慮具足住離欲者謂或緣離欲界
欲增上教法或緣彼教授為境界已斷欲界
煩惱雜染離惡不善法者謂斷欲界業雜染
法能墮惡趣故名為惡能鄣於善故名不善
尋者謂能對治二種雜染出離尋無恚尋無
害尋伺者謂能對治二種雜染出離伺無恚
伺無害伺離者謂由修習對治斷所治鄣所
得轉依生者謂從此所生喜者謂已轉依者
依於轉識心悅心勇心適心調安適受受所
攝樂者謂已轉依者依阿賴耶識能攝所依

令身怡悅安適受受所攝初者謂次第定中
此數最先故靜慮者謂已斷欲界雜染之法
尋伺喜樂所依依於轉依心住一境性具足
者謂修習圓滿住者謂於入住出隨意自在
又如經說尋伺寂靜故內等淨故心定一趣
故無尋無伺三摩地生喜樂第二靜慮具足
住尋伺寂靜者謂或緣離初靜慮欲增上教
法或緣彼教授為境界已初靜慮地尋伺寂
靜不復現行內等淨者謂為對治尋伺故攝
念正知於自內體其心捨住遠離尋伺塵濁
法故名內等淨心定一趣者謂如是入時多
相續住諸尋伺法恒不現行無尋無伺者謂

證得尋伺斷法三摩地者謂已轉依者心住
一境性生者謂從三摩地所生喜及樂已如
前說第二靜慮者謂尋伺寂靜內體徧淨三
摩地所生喜樂所依依於轉依心住一境性
餘如前說

又如經說由離喜故住捨念正知及樂身正
受聖者宣說成就捨念樂住第三靜慮具足
住離喜者謂或緣離第二靜慮欲增上教法
或緣彼教授爲境界已見第二靜慮喜相過
失住捨者謂於已生喜想及作意不忍可故
有厭離故不染汙住心平等心正直心無轉
動而安住性念者謂於已觀察喜不行相中

不忘明了令喜決定不復現行正知者謂或
時失念喜復現行於現行喜相分別正知樂
者謂已轉依者離喜離勇安適受受所攝身
者謂已轉依者若轉識若阿賴耶識心性無
別摠名爲身正受者謂已轉依者能攝受身
令身怡悅摠集說爲樂身正受此處樂受深

極寂靜最勝微妙上下所無聖者謂佛及佛
弟子宣說者謂顯示施設成就捨念樂住者
謂此地已上無妙樂故下地亦無如是勝樂
及無捨念以爲對治第三靜慮者謂離喜已
捨念正知樂所依止依於轉依心住一境性
餘如前說

又如經說由斷樂故及先已斷苦喜憂故不
苦不樂捨念清淨第四靜慮具足任斷樂者
謂入第四靜慮時先已斷苦者謂入第二靜
慮時先已斷喜者謂入第三靜慮時先已斷
憂者謂入初靜慮時不苦不樂者謂已轉依
者非安適非不安適受受所攝色界最極增
上寂靜最勝攝受無有動搖捨清淨者謂超
過尋伺喜樂三地一切動故心平等性心正
直性心無轉動而安任性念清淨者謂超過
尋伺喜樂三地一切動故心不忘失而明了
性第四者由次第定中第四數故靜慮者謂
樂斷故不苦不樂捨念清淨之所依止依於

轉依心住一境性餘如前說

又如經說一切色想出過故有對想滅沒故
種種想不作意故入無邊虛空虛空無邊處
具足住一切者謂諸行相色想者謂顯色想
出過者謂離彼欲故如出過義有對想滅沒
種種想不作意如是應知有對想者謂彼所
依四大想及餘所造色想種種想者謂即於
四大及造色中長短麤細方圓高下正及不
正光影明闇如是等類假色所攝種種想若
正入無邊虛空處時有對之想不現前故滅
及種種想不起作意由如是故超彼能依一
切色想無邊者謂十方諸相不可分別虛空

者謂色對治所緣境界虛空無邊處者謂此處轉依及能依定餘如前說

又如經說超過一切虛空無邊處入無邊識識無邊處具足住超過一切虛空無邊處者謂超過近分及與根本無邊識者謂緣無邊虛空之識今緣此為境界識無邊處者謂此處轉依及能依定餘如前說

又如經說超過一切識無邊處入無少所有無所有處具足住超過一切識無邊處者謂超過近分及與根本無少所有者謂於識處上境界推求之時無少所得除無所有無別境界由唯見此境極寂靜故無所有處者謂

此處轉依及能依定餘如前說

又如經說超過一切無所有處入非有想非無想非想非非想處具足住超過一切無所有處者謂超過近分及與根本非有想者謂超過無所有想非無想者謂於無所有處上境界推求之時唯得緣無所有極細心及心法由唯見此境極寂靜故非想非非想處者謂此處轉依及能依定餘如前說

建立生者謂先於此間修下中上初靜慮者後生彼處受三天果謂梵身天梵輔天大梵天若善修習無尋有伺初靜慮者生大梵天果更無異所勝彼處故若先於此間修下中

上第二靜慮者後生彼處受三天果謂少光
天無量光天極淨光天若先於此間修下中
上第三靜慮者後生彼處受三天果謂少淨
天無量淨天徧淨天若先於此間修下中上
第四靜慮者後生彼處受三天果謂無雲天
福生天廣果天從是已上離色貪故無方處
差別雖有修習下中上因然不建立生果差
別若下中上修虛空無邊處者受虛空無邊
處天生果若下中上修識無邊處者受識無
邊處天生果若下中上修無所有處者受無
所有處天生果若下中上修非想非非想處
者受非想非非想處天生果由定寂靜有差

別故及由住時滿不滿故彼有差別又由多
住愛味初靜慮乃至非想非非想處故不盡
壽命而有中天若雜修下品世間及無漏第
四靜慮者受無煩淨宮天生果若雜修中品
者受無熱淨宮天生果若雜修上品者受妙
現淨宮天生果若雜修上勝品者受妙見淨
宮天生果若雜修上極品者受無礙究竟淨
宮天生果若善修習菩薩無量不思議三摩
地所引第十地中第四靜慮者受出過淨宮
大自在天生果

清淨者謂邊際初靜慮依此引生一切勝德
及速疾神通如初靜慮清淨之想餘靜慮及

諸無色應如是知此中無色差別者謂發彼地解脫等功德

如是彼諸靜慮及無色定雜染潔白建立清淨差別應知

如是已說依止覺分今當說頌曰

覺分有衆多 最初三十七

論曰菩提分法品類多種最初勝者有三十七謂四念住等廣說如經

四念住者一身念住謂或緣於身或復緣身增上教法或緣彼教授爲境界已由聞思修之所生慧或唯影像或事成就於身境處善安住念爲令於身得離繫故如於身念住如

是於受心法念住應知亦尔此中差別者謂
各於自境如其所應乃至爲令於法得離繫
故又一切處應說與念相應心及心法如是
發起觀察心時所緣之境有四種事一心所
執事二心領納事三心了別事四心染淨事
四正斷者廣說如經一已生惡不善法爲令
斷故生欲策勵發起正勤策心持心已生者
謂麤纏所攝惡不善法者謂能起惡行欲界
煩惱及隨煩惱惡不善義已如前說爲令斷
故者諸修彼對治令微薄故生欲者謂起證
斷樂欲策勵者謂不忍受惡及歸趣斷故發
起正勤者謂多種堅固修彼對治此上三句

顯不定地中聞思兩慧下品對治策心者謂
修彼對治修慧現行若心沉沒煩惱染汙策
心令舉故持心者謂即此對治現行之時若
心浮舉煩惱染汙持心令下故二未生惡不
善法爲不生故乃至廣說未生者謂增盛隨
眠所攝能起麤纏之因爲不生故者謂令麤
纏不現行故生欲者謂起爲證不現行欲策
勵者謂由不忘住爲令不現行善住念故發
起正勤策心持心皆如前說三未生善法爲
令生故乃至廣說未生者謂所未得善法者
謂聞思修所生三慧由無過義故名爲善爲
令生故者謂令彼得故生欲者謂起證得欲

策勵者謂求彼攝受正方便故發起正勤者
謂長時殷重多堅修習此上三句顯得不定
地對治惡不善法聞思兩慧所攝善法策心
持心者謂為得修慧故餘如前說四已生善
法令住令不忘令修滿令倍修令增長令廣
大生欲策勵乃至廣說已生者謂已得故令
住者謂聞慧令不忘者謂思慧令修滿者謂
修慧此上三句顯唯守護已所得善令倍修
令增長令廣大者如其次第不唯於彼生知
足故生欲者謂起證得欲餘如前說
四神足者廣說如經一欲增上故得三摩地
如有行者先世修習上品善根於大師所或

於有智同梵行處生信生欲聽聞正法如所
信欲聞正法已展轉證得心任一境性由此
欲故三摩地成就已生未生惡不善法令斷
令不起故生欲乃至持心若未生彼對治善
法令其生故若已生者令住令不忘令修滿
令倍修令增長令廣大故生欲乃至持心如
是行者復修欲策勵信安正念正知思捨八
種斷行由此欲故三摩地成就者謂於此中
而得自在已生未生惡不善法者謂彼下品
諸纏所攝及彼微薄未損未害隨眠所攝令
斷令不起者謂為離已生軟品纏故及為損
害微薄隨眠故生欲乃至持心如前廣說若

未生彼對治善法令其生故若已生者令住
令不忘令修滿令倍修令增長令廣大故生
欲乃至持心如前廣說應知如是行者謂如
是修行多時住者復修欲者謂欲證彼不現
行及損害故策勵者謂欲爲因於奢摩他毗
鉢舍那發起正勤故信者謂生欲之因於彼
損害及所得中決定信故安者謂因策勵除
身心麁重令身心堪任故正念者謂於防護
沉下浮舉隨煩惱中令心不忘故正知者謂
或時失念隨煩惱現行之時分別正知故思
者謂於止舉中造作心故捨者謂於不染住
心平等心正直心無轉動性如是一切諸神

足中八種斷行應知此中差別者第二勤增
上故得三摩地如有行者依於教授及教誡
法或在空閑或居林樹或止靜室於如是處
長時勇猛純熟熾然正勤證得心住一境性
由正勤故三摩地成就餘如前說第三心增
上故得三摩地如有行者先已修習奢摩他
行由此因緣思惟內法速疾證得心住一境
性由修心故三摩地成就餘如前說第四觀
增上故得三摩地如有行者多聞聞持其聞
積集獨處閑靜即於彼法以慧簡擇極細簡
擇徧覺觀察因此證得心住一境性由觀察
故三摩地成就餘如前說

五根者廣說如經一信根由世間道令心清
淨鮮白無穢離隨煩惱得住不動從是已後
求諦現觀修習方便爲永斷隨眠故爲得彼
對治故起增上信二正勤根謂依信根增進
勇猛與信俱行三念根謂依正勤明了不忘
與彼俱行四等持根謂依念根心住一境與
彼俱行五慧根謂依等持根簡擇諸法與彼
俱行

五力者廣說如經即信根等由善修習多修
習故不復爲彼不信等法之所雜亂復能對
治諸雜亂法不可伏羲說名爲力

七遍覺支者廣說如經一念徧覺支謂由世

間道得備善力見道現前由先修習世間念
遍覺支引得出世無功用無分別於諦明了
於諦不忘二擇法遍覺支謂由先所引無功
用無分別依止於念與念俱行於諦解了於
諦覺悟如是一切諸遍覺支由先所引無功
用無分別後依止前與彼俱行皆應了知是
中差別者第三正勤遍覺支於諦心勇第四
喜遍覺支於諦心悅第五安徧覺支於真諦
中身心堪任第六三摩地遍覺支於真諦中
心住一境第七捨遍覺支於真諦心平等心
正直心無轉動性又如經說即於是中復善
修習寂靜依止乃至廣說寂靜依止者謂欲

界寂靜依故離欲依止者謂色無色界離欲
依故滅依止者謂已得蘊界處無餘永斷依
故趣向棄捨者謂未來蘊界處不相續故八
聖道支者廣說如經一正見謂於見道中得
徧覺支時見清淨及於修道中安立後得徧
覺支見清淨揔合此二名爲正見二正思惟
謂依正見與彼俱行離欲思惟無恚思惟無
害思惟於修道中相續作意思惟諸諦與無
漏作意相應令心趣入極趣入尋求極尋求
現前尋求覺了計筭觀察思惟思惟性三正
語謂於修道中依正思惟由相續無漏作意
思惟諸諦故得四種語業聖愛戒所攝不樂

離樂除滅種種離澄淨防護不作離作不行
不毀不犯橋梁船筏遠離不違越不種種違
越性四正業謂於修道中由相續無漏作意
思惟諸諦故得三種身業聖愛戒所攝不樂
離樂除滅種種離廣說如前五正命謂於修
道中乃至思惟諸諦故遠離所作邪命惡法
聖愛戒所攝廣說如前六正策勵謂於修道
中乃至思惟諸諦故於所修習念住正斷神
足根力之中欲樂正勤策勵勇猛堪任難制
心正奮發相續精進性七正念謂於修道中
乃至思惟諸諦故或依奢摩他道或依毗鉢
舍那道或依雙道於所修習擇法正勤喜安

等持捨徧覺支中念及正念隨念諸念不忘
念心明了性及不忘失極不忘失極不忘失
諸法性八正等持謂於修道中乃至思惟諸
諦故又依三道於所修中正念攝故心住安
住近住正住不乱不散正攝持奢摩他心住
一境性此諸道支後依於前相應俱起應知

復次頌曰

智與解脫門

行迹及止觀

論曰智者謂十種智廣說如經一法智謂於
內共了現見所知諸義境界無漏之智二種
類智謂於不共了不現見所知義境無漏之
智三他心智謂修所生修果能知他心及心

法智及諸如來知諸衆生隨其意解隨其隨
眠教授教誡轉起妙智四世俗智謂世間慧
由依此故如來爲諸衆生隨其意解隨其隨
眠宣說妙法五苦智謂於有漏諸行之中無
常苦空離我思惟若智若見明了覺悟慧觀
察性六集智謂於有漏諸行因中因集生緣
思惟若智若見餘如前說七滅智謂於有漏
諸行滅中滅靜妙離思惟若智若見餘如前
說八道智謂於能斷有漏諸行無漏道中道
如行出思惟若智若見餘如前說九盡智謂
苦已知集已斷滅已證道已修或緣盡境或
復爲盡若智若見餘如前說十無生智謂苦

已知不復當知集已斷不復當斷滅已證不
復當證道已修不復當修或緣無生境或爲
無生若智若見餘如前說

解脫門者謂三解脫門一空解脫門二無相
解脫門三無願解脫門空有二種一所知二
智所知者謂於衆生徧計性所執法中及法
徧計性所執法中此二徧計性俱離無性及
彼所餘無我有性於諸法中徧計性無即是
無我性有於諸法中無我性有即是徧計性
無即於此中有及非有無二之性無分別境
智者謂緣彼境如實了知無相亦有二種一
所知二智所知者謂即所知空境由此境相

一切諸相之所不行智者謂如前說無願亦
有二種一所知二智所知者謂由無智故顛
倒所起諸行相貌智者謂緣彼境伏惡了知
空行者謂於諸行我不可得及諸相中世俗
分別法不可得無相行者謂即於諸行中衆
生無我性可得及諸相中世俗分別法無我
性可及於滅中滅靜妙離行無願行者謂
無常苦不淨如病如癱如箭因集生緣行緣
智空道作道如行出行此亦是空行緣智無
相道作道如行出行此亦是無相行緣智無
願道作道如行出行此亦是無願行若無差
別揔名空無相無願者此通聞思修所生也

慧世及出世應知若名空無相無願三摩地者唯是修所生慧通世出世應知若名空無相無願解脫門者此唯出世應知

行者謂四種行廣說如經一苦遲通謂鈍根者未得現法樂住為盡諸漏若道若行二苦速通謂利根者餘如前說三樂遲通謂鈍根者已得現法樂住為盡諸漏若道若行四樂速通謂利根者餘如前說

迹者謂四法迹廣說如經一無貪迹謂能持尸羅蘊法義故名迹若未受者令進受若已受者令守護令增長令廣大如無貪第二無瞋亦令三正念迹謂能持三摩地蘊法義故

名迹未生者令生已生者令增廣四正等持
迹謂能持慧蘊解脫解脫智見蘊法義故名
迹若未生未證者令生令證若已生已證者
令增令廣

止者謂於如所聞思法中正修行時由緣三
摩地影像境作意故得安三摩地故任心於
內觀者謂於如所聞思法中正修行時由緣
三摩地影像境作意故得安三摩地故簡擇
諸法

復次頌曰

居處及所依
地波羅蜜多

發心與悲愍

諸行通達性

論曰居處者謂四居處廣說如經一慧居處
謂諦觀方便世間之慧爲安立證諦出世智
義故二諦居處謂已得諦觀出世慧爲安立
有事顛倒斷義故三捨居處謂有事顛倒斷
爲安立無餘煩惱息滅義故四寂靜居處謂
無餘煩惱寂靜爲安立一切苦不生義故
所依者謂四種依廣說如經一依法不依衆
生謂若法是如來所說或弟子說十二分教
隨學隨轉不隨衆生所行行學亦不隨轉二
依義不依文謂若法非飾詞者所造綺文字
句唯能顯了獨滿清淨鮮白梵行於此法中
恭敬信解非於能顯顛倒梵行及不顯了梵

行但飾詞者所造綺文字句三依了義經不
依不了義經謂於如來所說相似甚深空性
相應隨順諸緣緣起法中不妄執著如言淺
義亦不住自內見取心唯勤尋究顯了義經
四依智不依識謂不唯聽聞而生知足便不
進修法隨法行然爲盡諸漏勤求自內證真

諦智

發心者謂諸菩薩發菩提心若諸菩薩住菩
薩法性爲欲利益十方世界所有有情依彼
行相強勝因緣於阿耨多羅三藐三菩提發
大誓願受發心法謂我必定當證阿耨多羅
三藐三菩提爲度十方一切有情令離諸煩

惱故及離諸苦難故此受發心復有二種一
世俗發心二證法性發心世俗發心者謂如
有一隨智者前恭敬而住起增上意發誓願
言長老憶念或言聖者憶念或言鄔波陀耶
我如是名從今日始發阿耨多羅三藐三菩
提心爲欲饒益諸有情故從今已往凡我所
修布施持戒忍辱正勤靜慮及慧一切皆爲
證得阿耨多羅三藐三菩提故我今與諸菩
薩摩訶薩和合出家願尊證知我是菩薩第
二第三亦復如是證法性發心者謂如有一
已過第一劫阿僧祇已證菩薩初極喜地
已入菩薩定無生位已如實知無上菩提及

菩提方便已悟自身將近等近大菩提果證
解自他悉平等故得大我意已至不任流轉
寂滅菩薩道故得廣大意由如是故於大菩
提願不退轉是謂證法性發心

悲愍者謂如是已發心菩薩於十方世界或
三種退墮苦有情或五趣定苦有情或四種
極苦有情或六種重苦苦有情或三種相苦
苦有情諸如是所令離苦行不害為性

諸行者謂十種法行廣說如經一於菩薩藏
法若多若少尊重恭敬書持法行二若劣若
勝諸供養具供養法行三若自書已由矜愍
心施他法行四若他發意恭敬尊重以微妙

聲宣揚闡讀由宗仰故諦聽法行五發淨信
解恭敬重心披讀法行六為欲修習法隨法
行從師受已諷誦法行七既諷誦已為堅持
故以廣妙音溫習法行八悲愍他故傳授與
彼隨其廣略開演法行九獨處閑靜極善研
尋稱理觀察思惟法行十如所思惟修行奢
摩他毗鉢舍那為欲趣入乃至為令諸所求
義成就法行

尺

顯揚聖教論卷第二

棄

弃字

怡悅

上余之反和樂白也

殀夫

二同於小反少喪也

策勵

上楚

責反也

強勉也

奕

軟字

筏

音伐

束竹木

渡水

也

南

奮

奮

方問反
振也
亦去
和
尚
企
耶
此
上
去
無
央
數
也
矜
愍
也
恤
也
下
音
敏

徒困反
利也
鄔波柁耶
鄔一古反
柁徒
親教



